

東
華
續
錄

東華續錄

同治七十七

臣王先謙敬編

臣張式恭恭校

二月癸卯朔諭清安籌銀一萬兩墊發吉林官兵整裝銀兩撥山東地丁銀還之○調巴里坤滿漢官兵二百名赴科布多助剿○改福建海壇鎮右營遊擊爲都司裁水師營千總九把總十六外委二十二戰守兵六千七百三十九名○甲辰諭軍機大臣等據長善奏瀝陳邊關緊要情形請飭文武和衷振作辦理一摺直隸軍務雖已肅清而關內盜萌未絕奉天熱河等處節經嚴緝盜匪而邊外馬賊仍不免出沒無常加以土匪奸民俱應隨時緝捕長善所奏於緝盜防邊不無裨益著玉亮於到任後嚴飭所屬體察情形於關門出入人等認真盤詰遇有查出奸匪卽知照地方官

緝拏懲辦並著曾國藩嚴飭各該州縣一體振刷精神將保甲民團各事宜極力整頓以期互相聯絡各專責成將此各諭令知之○諭定安桂成奏馬隊官兵續獲勝仗敗匪退回邊內並請飭山西巡撫籌撥短解等項餉銀各摺片據稱回逆竄踞拉什吹明召之庫家鋪經烏爾圖那遜扎那格爾第等率隊進剿斃賊甚多追至杭錦旗界賊已由鄂托克旗遁入邊內見在伊克昭盟鄂爾多斯七旗草地已無賊蹤等語惟陝甘回匪每因邊內受創卽走草地自應扼要嚴防以杜分竄著定安等迅咨杜嘎爾督飭達爾濟所部駐紮河西新召一帶其河西十里長灘哈拉寨等處並著檄飭烏爾圖那遜等各帶所部駐紮與見紮古城之張曜一軍聯絡聲勢毋任該逆乘虛再犯仍一面嚴飭馬陞督率官兵加意防守不准稍涉疏虞據奏山西應解各款未能如數解到馬步官兵餉

乾均難按月支發自係實情著鄭敦謹迅飭該藩司於戶部指由京餉劃撥銀十萬兩內之短解銀四萬兩及允解防兵月餉之欠解銀五萬餘兩並二月應解防兵月餉三萬兩一併趕緊籌解毋得藉詞推延至滿蒙旗綠各營官兵餉銀亦關緊要仍著該署撫遵奉前諭卽飭該藩司查明所欠數目源源撥給以贍軍食將此由五百里各諭令知之○丁未欽奉 慈安皇太后 慈禧皇太后懿旨皇帝大婚禮儀典則崇隆允宜先期豫備一切應辦事宜著派恭親王寶鋆會同總管內務府大臣禮工二部堂官詳查典章敬謹辦理○諭軍機大臣等戶部奏遵查各省釐金酌定添撥西征軍餉並請飭各省整頓釐金各摺片左宗棠前請按年籌撥陝甘寶餉四百萬兩見據戶部將各省釐金覈明通盤籌計奏請酌量添撥西北餉源素絀本仰給於東南陝甘見又軍務方殷自

不得不寬爲籌備卽著照戶部所議安徽省除接濟郭寶昌餉需軍火外無論釐金捐輸項下著吳坤修每月添協陝甘餉銀二萬兩每年共添協銀二十四萬兩浙江省除每月原協左宗棠軍餉銀七萬兩外著李瀚章每月再添協陝甘軍餉五萬兩每年共添協六十萬兩該省每年協濟雲貴軍餉十餘萬兩仍著照常籌解該撫前奏每月再各撥五千兩卽著毋庸添撥其應協山西清淮各餉不得藉口停免該撫當將該省防兵如何裁遣或酌補兵額之處認真籌辦以節經費見辦塘工捐輸及外省收捐分局仍著照舊辦理毋庸議改湖北省每月除原協陝甘各餉外著李鴻章郭柏蔭每月再添撥陝甘軍餉銀四萬兩每年共添撥銀四十八萬兩該省歲入各款較前徵收短少該督等隨時逐款整頓並將用款酌量緩急以資周轉本省及外省捐輸仍著照常辦理毋庸

議改江西省除地丁項下每月原協陝甘軍餉銀二萬兩外著劉坤一每月再添撥陝甘軍餉銀四萬兩每年共添撥銀四十八萬兩江西釐金仍須認真經理毋令減色福建省除每月原協陝甘軍餉銀四萬兩照常籌解外著英桂卞寶第每月再添撥陝甘協餉四萬兩每年共添撥四十八萬兩江蘇省除曾國藩前奏由該省每月協濟陝甘軍餉十萬兩每年共一百二十萬兩照數按月批解外著馬新貽丁日昌每月再添協陝甘餉銀三萬兩每年共添撥三十六萬兩該省釐金仍當整頓其各屬捐輸著照常勸辦毋庸議改至畱防直東江鄂各軍食餉尙鉅應如何漸次裁減著會商李鴻章妥籌辦理至瑞麟前奏廣東省提存釐金五成協撥外省軍需未據酌定准數著瑞麟李福泰於原協陝甘餉銀每月四萬兩照舊籌解外每月再添撥陝甘餉銀三萬兩每年共添撥

三十六萬兩該省添支各項經費著瑞麟等力求撙節以省虛糜其本省及外省捐輸事宜仍著照舊辦理以上添撥銀兩著該督撫等自本年正月始一律照數籌撥遇閏加算按月各解交湖北省陝甘後路糧臺交收均不准稍分畛域偶有蒂欠致誤要需該督撫等總當顧全大局妥速籌解左宗棠於接到餉銀時著按照陝甘兩省缺餉多寡分別接濟勻撥以昭公允其各省原協陝甘各路軍營餉項均著照舊支應毋稍牽混各該省報解陝甘新舊撥款及左宗棠劉典穆圖善等營收到各省撥款並各路捐局所收捐款均著隨時奏報以憑查覈西征軍餉竭各省之力以供應用左宗棠當撙節支發毋稍糜費該大臣前請撥四百萬見已酌撥至三百萬兩不爲不多合之原協各餉及收捐款目每年統計九百五十餘萬兩該大臣原請銀數能否覈減卽著迅速覆奏並

將各營需餉實在數目分別詳細奏聞釐金一項既據各該省奏報每年減收已不下數百萬兩若辦理不善經費將何所出各該督撫仍須悉心酌覈力除中飽毋得徒博虛譽率行減免遇有局卡太密重複徵收者仍隨時裁汰懲辦其釐金報部章程仍照兩淮鹽釐半年奏報一次著馬新貽將開報式樣鈔錄咨行各該省查照辦理原摺片均著鈔給閱看另片奏遵議穆圖善請催撥餉等語湖北省奉撥甘肅餉銀二十萬兩據郭柏蔭奏報已如數批解著穆圖善查明此項撥款是否收到專案報部查覈尙未收到卽著派員迎提左宗棠前借洋款二百萬除已提撥銀二十萬兩解甘外其餘應分甘省若干著左宗棠趕緊覈算將應分甘省之款陸續撥給其指撥各海關六成洋稅一百萬兩業據各關奏報批解過半並著該大臣分半勻給甘肅省毋稍延欠四川應解甘

省鹽釐銀二十萬兩見在解到若干著左宗棠穆圖善查明迅速
報部並著吳棠迅將此項銀兩埽數解清毋許推諉其河南等省
應協甘餉銀卽著戶部開單分投嚴催毋任延宕將此由六百里
諭知左宗棠李鴻章穆圖善馬新貽英桂瑞麟吳棠丁日昌劉坤
一李瀚章卞寶第郭柏蔭李福泰並傳諭吳坤修知之○諭戶部
奏請飭各省整頓丁漕按限奏報等語國家維正之供以地丁漕
糧爲大宗各直省自被兵以後瘡痍甫起田地未盡開墾徵收錢
漕勢難驟復定額自係實情然理財之道不外盡地力而務農功
果能設法招墾次第推廣賦額自日見起色本屆江浙新漕較之
上年數目仍不相上下各直省地丁所入缺額仍多若不力圖整
頓恐年復一年正供半歸虧欠國用所關豈容膜視著各直省督
撫嚴飭該地方官將招墾開徵諸事宜實力講求以期漸復舊額

並著自同治八年爲始督飭藩司將全省一年上下兩忙徵收丁漕各實數及上屆徵收總數開具比較清單詳明專案奏報統限各該年年底出奏以備稽考毋得遲逾將此各諭令知之○諭左宗棠劉典奏請畱見任藩司辦理經手事件鄭敦謹奏請飭分撥張曜軍營駝隻金順奏花定防剿情形並請飭晉省借撥京餉各摺片西路定邊花馬池一帶時有賊匪竄擾各軍分路追剿疊有斬擒賊俱敗退惟北山官軍雲集劉松山一軍已抵鎮靖如該逆畏懾兵威別圖竄擾花定一帶恐復喫緊著金順會同張曜體察情形相機布置節節西進掃蕩逆氛榆林附近波羅堡之賊雖已聞風遠遁仍著金順檄飭常福統率所部由邊外之紅洞澗一帶視賊所向認真剿辦郡王旗地方如尙有匪竄伏卽著派隊往剿毋任蔓延左宗棠庫克吉泰劉典務當統籌方略將一切進止機

宜與金順會商分投勦洗以期次第廓清左宗棠等請將林壽圖暫畱陝西藩司之任清理經手事件卽著飭令林壽圖暫緩交卸金順軍營需餉甚迫著鄭敦謹暫將應解京餉借撥十萬兩迅解金順軍營仍著該署撫將欠解金順之餉先行湊足十萬兩補解戶部以清款項張曜一軍見紮古城採辦軍食轉運不易前因金順糧運艱難諭令定安等籌辦駱駝三千隻解赴榆林卽著定安於此項駝隻內分撥四百隻解交張曜軍營驗收俾資轉運將此由六百里各諭令知之○諭崇實吳棠奏川軍赴援徽縣情形並派兵援滇抽練營兵各摺片甘同由秦州南犯直撲徽縣經駐防大安之副將宇文秀等帶兵掩擊生擒回目馬義和等並將全股逆匪殲滅無遺徽境一律肅清勦辦甚屬奮勉出力員弁及傷亡勇丁准其查明分奏別請獎卹雲南尋甸賊勢猖獗情形緊急川

滇脣齒相依自應速籌援應崇實等見已撥銀接濟並調唐友耕一軍馳赴東昭尙能力顧大局著該將軍等飭令會合滇軍相機防剿以全危局其川北一帶並著飭令李有恆嚴爲戒備毋稍鬆懈川省用兵日久餉需支絀所議裁勇練兵自爲節餉整軍起見著卽督同富林保胡中和將旗綠各營認真訓練俾成勁旅以備緩急之用所請酌加津貼銀兩卽著照數覈實動支將此由五百里各諭令知之○飭安徽添撥銀二萬兩浙江五萬兩湖北江西福建各四萬兩江蘇廣東各三萬兩按月解濟陝甘軍餉○戊申上詣 大高殿祈雨○諭軍機大臣等本日據左宗棠奏榆林暨薩托清一帶肅清宋慶一軍應否飭其回豫免滋勞費等語上年陝回竄擾邊外歸綏等處所調防剿兵勇人數甚多購糧不易左宗棠西征各軍亦以兵多糧絀爲虞是轉運日煩軍行轉增苦

累見在歸綏薩扎清一帶及榆綏各屬一律肅清且春融凍解晉防較鬆所有前次調赴歸綏之神機營吉林黑龍江馬步各隊天津之洋槍隊如可撤回著定安斟酌情形具奏宋慶一軍雖屬採糧維艱而該軍素稱得力既由太原取道永甯入陝若再令折回未免徒勞跋涉張曜見在陝西北路卽著左宗棠迅飭該提督率隊前往會同張曜相機堵剿杜賊東趨將此由五百里各諭令知之○左宗棠奏正月十五日以前提督劉端冕道員魏光燾剿辦歸巢回逆連獲大勝業經臣等於正月二十三日馳報其時僅據魏光燾十四日收隊後稟陳大略情形而劉端冕戰狀亦止敘至正月十一日止頃據魏光燾稟十五日擊敗將臺歸巢之回逆先據生擒賊供係回酋胡元帥所帶十五日收隊後訊生擒各賊始知胡元帥卽虎元帥之訛而賊中所稱虎元帥卽白彥虎蓋賊中

十八酋之一兇悍素著者也是日斃賊千餘生擒逆目張阿寶馬
元元及悍黨百名總兵吳禧德陣擒執旗賊目賊刃傷吳禧德左
手吳禧德急開小洋槍斃之割其首級未詳其名而自此賊殫斃
後諸步賊奔潰不暇回顧知必賊中巨目也十六日搜捕山谷餘
賊又有擒斬而其軍之畱駐吉字峴者於十五夜訶知前竄澄城
邵陽韓城各境回騎經郭寶昌擊敗後餘賊復竄至洛川楊樹村
劫去官軍運糧馱騾二十餘頭向交口竄走畱守吉字峴老營知
縣余甫勦飭守備楊金龍及各營隊伍進剿訶知騎賊夜聚普羅
村卽夜出隊掩擊三鼓直抵賊巢先設伏左右兩路斷其紛竄楊
金龍等首先殺入賊正酣睡驚起亂竄伏兵齊發槍轟矛刺賊屍
徧野騾馬糧食概經奪獲惟回目白同舉棄馬逃走僅獲其馬此
股殲除殆盡矣劉端冕自初十一等日截剿劉家屯岳家屯回

竄之賊後十三日戌刻探報後股回逆又竄近延安劉端冕立飭副將喻經魁率所部趨勞山爲疑兵以分賊勢自率中前左右四營趨高家哨俟賊竄近則設伏擊之天明抵高家哨已刻遙見馬衣山後塵氛大起劉端冕急飭副將文明章參將黃承佐迅渡洛河伏雷村左右伺賊半渡擊之飭提督甘大有率所部伏牛武川之左自率中營伏牛武川之右約聞中營號聲則起布置甫定賊果由牛武川蠡擁而來中營號聲起右營應之賊見官軍突出大驚棄馬分竄官軍兩路夾擊斃賊無數其冒死搶渡者適冰泮水長擁擠不前官軍乘勝蹙之偪溺無數其先渡之賊又經雷村伏軍突出截擊無一免者其喻經魁一營是日辰刻甫抵小勞山而賊之馬步數千已麤聚大勞山廢寨午刻整隊進擊賊見官軍無多遽前搦戰喻經魁堅陣不動卻之鏖戰數時轟斃悍賊數十名

賊翻山而竄知前股已經官軍痛剿不敢復趨舊路繞向蔡家山
覓徑狂奔劉端冕調知之十五日黎明潛師赴王家坪以待逾時
賊果絡繹翻山而下劉端冕飭前左兩營由左右鈔襲其後自率
中右兩營奮起突擊賊駭而奔官軍壓之斃賊甚多其已搶渡過
河者又經先鋒馬隊過河追及步隊追至石門子餘賊奪路狂奔
十六日追至洪家河則賊已散竄歸巢矣其回逆另股由董志原
西南竄出者賊目王明章等馬步千餘由甘肅秦州竄擾吳家河
張家莊等處有窺伺鳳縣唐藏以入棧道之意駐軍寶雞之總兵
李輝武調知之正月十六日飭分駐鳳縣之總兵胡國珍副將楊
恩澤率兩營擊之追抵唐藏賊已遁竄倒回溝胡國珍楊恩澤分
三路追擊斃賊甚多賊由隘口辛家山一帶竄向黃牛鋪而遁十
七日李輝武親率副將邵永齡總兵王名滔提督王照南副將蕭

德林各帶七成隊馳往督剿十八日丑刻行抵東河橋聞賊已由黃牛舖竄至梅家溝李輝武急飭四營分路鈔襲自率親兵由中路直入賊不料官軍速至駭懼思逃而左右兩路官軍已截其去路槍礮齊施刀矛並進立斃悍賊數十名該逆仍冒死衝突各營乘勝掩殺將溝中之賊全股撲滅其騎賊百餘先奔原上者向馬頭飛奔而遁躡蹤追剿沿途迭有擒斬餘賊由通同峪回董志原老巢官軍始收隊回寶雞提訊生擒回逆殷元兒等訊知回目王明章上臘二十日率其黨千餘由董志原至秦州一路擄掠至鳳縣不料卒遇官軍王明章於十八日在梅兒溝經官軍擊斃其先鋒藍正魁海全幅在倒回溝亦經官軍陣斬此股已剿滅殆盡矣臣等前會商剿辦同逆不峻拒以絕其求生之心亦不輕許致墮其緩兵之計乃犬羊之性反覆無常方求撫時仍一面四出竄掠

北路則擾及定邊東北則擾及甘泉延安延川東路則擾及宜洛韓邵澄城西南則擾及秦州鳳縣縱橫馳突股數甚繁步騎雜遯實兼髮逆之悍捻逆之狡而有之幸北路東路東南西南路各軍且防且剿無戰不克大挫兇鋒可否仰懇 天恩准 臣等擇其尤爲出力者彙爲一案分別保獎以獎前勞而策後效伏候 聖裁

上諭左宗棠奏官軍截剿逆回大獲勝仗一摺剿辦尙爲得手所有各軍歷次剿賊出力員弁准左宗棠等擇尤彙案奏請獎勵○左宗棠奏 臣於正月初三日准軍機大臣字寄同治七年十二月二十七日奉 上諭前據左宗棠奏請飭催軍餉當交戶部速議具奏茲據該部奏稱左宗棠前奏陝甘缺餉數目暨請增撥鉅款並未明晰前撥六成洋稅一百萬兩未嘗無裨於陝餉其各省釐金應由各該省定議再行覆覈籌撥於撥餉之期並無遲誤陝

省缺餉數目據劉典奏明每年需餉三百萬兩除本省所入及江廣粵海關海江漢協餉外仍不敷銀一百四十萬兩自應酌量添撥甘省情形雖據穆圖善陳奏月需餉四十萬兩未據逐款分晰等語陝甘常年軍餉及見在用兵餉需必須逐款分明方免轉轄陝省據劉典所奏缺餉已有確數著該部迅卽酌度情形彙案添撥以資接濟甘省每年實需餉若干除本省入款及各處協款外缺餉若干各省專協甘肅之款何處尙能協濟何處並不協濟著左宗棠穆圖善會同覈議縷晰陳明再由該部酌覈辦理郭寶昌一軍見已增募馬隊三千餘於陝餉有無窒礙著左宗棠悉心酌辦戶部原摺著鈔給左宗棠閱看欽此竊維陝西餉項每年需銀三百萬兩經署撫臣劉典陳請業經部臣議准陝餉可期有著甘省之餉臣欽奉諭旨後卽咨署督臣穆圖善覈明會奏郵遞梗阻

未卜何時接其覆緘然臣竊意甘肅軍營因餉缺太久士氣難以

速振穆圖善雖極意整理亦恐勢有所難非俟度隴後按營點驗

切實釐剔需以次第經理難言實濟也臣之由秦入隴尙難剋期

未入隴之前無從懸定其餉數之多少言多則糜國帑言少則拂

人情總於大局無益竊以甘肅缺餉既鉅且久穆圖善實已艱苦

備嘗見值銷兵之時東南軍餉已有贏餘自宜及早撥給以固軍

心而蘇民困多寡之間臣未敢臆斷也臣軍馬步七十餘營本是

楚軍劉典前奏陝餉未曾附入穆圖善覆奏甘餉臣又未便附入

如歸陝甘計算既患輻輳不清不歸陝甘計算又苦虛懸無著再

四籌思惟有據實開列清單恭呈 御覽伏懇 天恩飭部速議

指撥專款急濟要需此後部撥臣軍實餉請卽名爲西征實餉各

省協撥臣軍之餉亦卽以西征名之庶幾眉目朗然部臣容易稽

覈而臣軍此時可免侵佔陝餉攫取甘餉之疑異時辦理報銷亦易清晰至於清單內約計數目均就見在時地而言原非一定章程卽營哨增減亦無一定常額臣惟有實用實銷隨時另案咨報戶部以昭清白臣雖無狀不敢以餘粟餘財自污系節上負深恩劉典制行清嚴同時各將領尙均樸實耐苦至於高連陞劉松山不就廣東提督無事映區而馳驅於層冰積雪之間力圖報稱其志節凜然尤可概見此時西征餉需寬裕一分卽多爲朝廷辦一分實事爲閭閻多畱一分元氣區區愚忱實匪有他謹將臣與撫臣所部楚軍由臣發給月餉數目並變通糧價及採買製造轉運各費開具簡明清單恭呈御覽統計西征實餉每年共需銀四百六十餘萬兩其陝甘各軍餉項及賑撫難民安插降眾開墾屯田等經費均不在內合併聲明軍機大臣奉旨戶部速議具奏○

左宗棠奏請以翰林院侍讀學士袁保恆督辦西征糧臺並專摺奏事允之○辛亥諭內閣景紋奏懇陳西藏僧俗受戴情形代請獎勵一摺據稱上年西藏辦理瞻對事竣該達賴喇嘛等以商上僧俗及在事漢番各員均邀獎敘惟駐藏大臣未奉恩旨公同具呈代爲景紋請獎等語覽奏甚爲詫異景紋身爲駐藏大臣辦理藏務本屬分內之事乃以俯順番情爲詞自行乞恩向來無此體制且據稱新任駐藏大臣恩麟卽日可以到任如果該達賴喇嘛等愛戴情眞何不呈請恩麟具奏景紋雖託詞批駁數次仍於交卸之先自行陳請實屬卑鄙無恥景紋著交部嚴加議處尋兵部議以降四級調用無庸查級紀議抵從之○甲寅諭軍機大臣等麟興等奏見聞招撫布倫托海變民並請酌畱餉銀一摺據稱巴里坤領餉委員毓秀等經伊勒屯等派往布倫托海招撫變民麟

興等見已催令先往辦理等語布倫托海變民見在情形若何日久未見奏報何以伊勒屯等遽行派員招撫是否確有把握果能悔罪輸誠未始不可網開一面予以自新若辦理稍涉遷就恐此等愚民不知畏威感恩難免復蹈故轍著麟興榮全錦丕勒多爾濟伊勒屯何瑄飭令該委員等相機妥辦不可輕率從事致貽後患福濟錫綸身任布倫托海大臣此事是否可行並著會商籌辦其哈密練勇應否調用著福濟等仍遵前旨斟酌情形知照文麟辦理麟興等請將布倫托海餉銀酌留四五萬兩借用等著照所請酌量留用將此由五百里諭知麟興榮全錦丕勒多爾濟福濟錫綸文麟伊勒屯並傳諭何瑄知之○丙辰諭軍機大臣等劉嶽昭奏馬龍州城解圍需益餉道無阻見調勁旅合攻尋城一摺尋甸逆首楊標奇等率眾萬餘由王家莊直竄馬龍經副將楊國發

等連番追擊斬馘甚多並將湖瓜田等處賊營焚毀馬龍州城圍立解王家莊踞匪焚寨而逃附近村堡亦一律收復其竄踞潞益境內之三營各村逆股並經總兵謝景春等先後攻克賊眾奔潰潞益餉道得以無阻見在東昭三郡亦皆安堵卽著該督商同岑毓英督飭李廷標等乘此聲威分路進剿一面飭令楊玉科等進攻八甲果馬並守備任順有招集鄉練四面兜圍以期迅復尋城毋稍鬆勁劉嶽昭仍當懷遵疊次諭旨親赴前敵督軍進取以贖前愆此次解圍出力之副將楊國發等著暫行存記俟尋甸收復後再由該督同其餘出力員弁及傷亡兵勇分別奏請獎卹另片奏革職總兵懇請開缺隨營等語革職畱任昭通鎮總兵李家福著毋庸開缺仍責令帶隊剿賊以觀後效將此由五百里各諭令知之○丁巳太僕寺卿徐繼畬以老病乞休命以二品頂帶致仕

○戊午日重輪抱珥五色○諭軍機大臣等總理各國事務衙門奏分界事宜請飭迅速辦理一摺前據福濟等奏稱科城所分之地西至瑪呢圖噶圖爾幹卡倫已包過布倫托海之西三百餘里布倫托海見無與俄國可分地界惟瑪呢圖噶圖爾幹卡倫以東所包布倫托海之三百餘里內有無塔城管轄之地未據該大臣等詳細聲明如見在應分界內有向歸塔城屬地即係布倫托海專管之處該大臣等仍當遵照前旨將分界事宜妥爲經理今日之布倫托海即前日之塔爾巴哈台異名而不異地不得藉詞含混意存諉卸若實無塔城屬地則該處分界之事自應歸奎昌經管即著責成奎昌悉心辦理毋許推諉至立界一事上年遲誤此次約期已近若再不迅速舉行尙復成何事體著榮全奎昌福濟按照定約如期前往各將應分地界會同俄使妥速辦結並著麟

興錦丕勒多爾濟明琚錫綸於該城分界事宜隨時與榮全等商酌妥辦毋稍膜視儻該將軍等藉故耽延致有貽誤卽著總理各國事務衙門據實參奏原摺均著鈔給閱看將此由五百里各諭令知之○論文麟景廉按捕哈密賊匪嚴防要隘○予陝西殉難知州鄭壽齡祭葬世職○己未諭軍機大臣等前據岑毓英奏籌辦滇省軍務八條當交該部速議具奏茲據覆奏逐條酌議請飭該督撫認真籌辦並飭各省迅撥餉銀等語滇省杜逆盤踞迤西日久稽誅上年復陷楚雄等處擾及省垣一帶若不練兵選將力圖攻剿恐匪勢蔓延愈難收拾岑毓英所陳各條係爲破除積習大舉進剿起見自應速籌辦理著劉嶽昭岑毓英卽照部議章程悉心會商將擇將選兵練勇各條實力整頓並將分道進取之處妥籌辦理不得日久因循有名無實原摺單著鈔給劉嶽昭岑毓

英閱看至滇省軍餉缺乏各省協撥之款自應趕緊籌解四川湖南山西浙江每月共應撥銀十二萬一千六百餘兩著吳棠劉崐鄭敦謹李瀚章嚴飭藩司迅速籌款按月起解其常年兵餉及酌提餉銀亦卽陸續籌解不得仍前延緩岑毓英所請劃撥鄰省協餉著照部議將浙江應解滇餉銀六萬兩江西應解滇餉銀四萬五千兩一併改歸湖北撥解著李鴻章郭柏蔭轉飭藩司在於本年應解京餉款內劃出趕緊解滇並著李瀚章劉坤一文輝將應解滇餉劃解部庫以清款項其廣東省並太平關欠解滇餉銀十三萬八千兩著瑞麟李福泰卽行備齊派員由輪船解至漢口卽由李鴻章等委員遞解滇省以期迅速至粵鹽劃抵滇省欠餉案內撥銀二十萬兩著瑞麟李福泰仍遵前旨限本年三月前分批解赴劉嶽昭軍營毋稍遲延原單均著摘鈔閱看將此由六百里

諭知李鴻章瑞麟吳棠劉嶽昭鄭敦謹郭柏蔭李瀚章劉崐劉坤
一李福泰岑毓英並傳諭文輝知之○庚申 上詣 大高殿祈
雨○壬戌諭軍機大臣等福濟錫綸奏哈薩克殺賊獲勝籌辦分
安厄魯特人眾暨安置索倫各摺片布倫托海叛民殺害哈薩克
多人哈薩克率眾尋仇遂將叛民圍殺福濟等見與奎昌等商酌
撥給火藥等件助其攻擊卽著飭令該郡王凌扎棟魯普轉飭該
頭目等勦力進攻迅將叛民盡數殄滅朝廷必立予恩施獎其義
憤見在哈薩克既與賊交惡圍攻賊營布倫托海地方事有轉機
福濟等前請調哈密巴里坤兵勇應否卽行停止卽著相度機宜
知照文麟伊勒屯何瑄辦理至厄魯特人眾尙多聚之一方不如
散之各處自係實情福濟等擬於科城之杜爾伯特地方量爲安
插再於烏里雅蘇台庫倫所屬喀爾喀等四愛曼內定地分置卽

著奎昌明瑤調令棍布扎普赴科面爲開導令其酌量杜爾伯特地方可以安置若干戶責成該王妥爲經理其餘人眾卽在車臣賽因諾顏土謝圖扎薩克圖等四愛曼內安置著麟興榮全錦丕勒多爾濟張廷岳阿爾塔什達各飭該旗汗王等遵照辦理不得互相推諉此項人眾安插得所卽各歸該管大臣隨時約束一切未盡事宜著麟興奎昌張廷岳等會商福濟等悉心籌畫務臻妥協至阿爾泰山南既有見成隴畝地多閒曠可以安插索倫人眾著福濟等斟酌情形妥速籌辦一面咨商麟興等將厄魯特人眾趕緊分布免與索倫雜居一處滋生事端將此由五百里諭知麟興榮全錦丕勒多爾濟奎昌明瑤福濟錫綸文麟張廷岳阿爾塔什達伊勒屯並傳諭何琯知之○展普濟堂功德林賁賑兩月○癸亥諭內閣近來參革人員往往以軍營爲捷徑夤緣保舉著各

督撫畱心察看從嚴參劾州縣爲親民之官當久於其任方能洞悉民情無得存調劑之見率行更換至屬員拜認師生向干例禁著隨時訪察嚴行禁止前因軍務方殷拏獲匪徒就地正法原屬一時權宜之計業經肅清省分遇有要犯仍由該上司覆覈辦理各州縣防堵公局本以保衛閭閻見在軍務已平卽查明裁撤以省擾累○以紹誠爲河南按察使

由開歸陳許道遷

○甲子諭軍機大臣

等穆圖善奏收復肅州大概情形請將出力員弁獎勵並鈔錄肅州回目原稟暨遵繪地圖附陳甘省兵勢賊情餉事擬由川省招募兵勇請飭成祿自設糧臺金順回駐花定各摺片所陳收復肅城情形與成祿前奏大略相同前諭楊占鼇隨同成祿出關剿賊惟見在肅城新復一切善後事宜亟須布置該署督卽飭楊占鼇暫駐肅州會同該鎮道等悉心籌辦毋令再生事端甘州金塔等

處匪蹤未淨並著該署督飭令李守愚等相機布置以靖地方至
回目稟內所稱沙州口外各回民奉烏魯木齊妥老阿渾送書來
肅寄來帥印二顆其中有無別項情節成祿見在出關卽著就近
查明斟酌辦理其餘稟訴各情亦著穆圖善隨時體察以消反側
成祿統軍西行本無定所應於何地安設糧臺便於呼應之處仍
著該提督自行派員督辦該軍應需糧餉著左宗棠於撥給甘餉
內分籌該軍的餉數成毋令缺乏穆圖善亦當於甘餉解到時按
照左宗棠所籌成數徑解成祿糧臺不可意存歧視四川等省每
年應協成祿軍餉卽著戶部查照原撥省分迅速咨催前解金順
見已移紮定邊花馬池一帶卽著督率所部兵勇實力防守遏賊
東趨磴口糧臺是否被回匪全搶著左宗棠庫克吉泰穆圖善定
妥鄭敦謹劉典查明實在情形具奏委員烏勒西布等下落並著

穆圖善飭員查辦甘省兵勇缺額太多由四川招募充補能否得力糧餉能否接濟著該署督酌度辦理甘民困苦已極該署督自當妥籌良策用就救平不得以餉絀兵單爲辭稍存諉卸左宗棠已行抵乾州於甘省情形知之較易該署督便可將兵勢賊情彼此和衷商辦迅奏廓清以紓屢繫穆圖善奏磴口糧臺被搶片著鈔給左宗棠庫克吉泰定安鄭敦謹劉典閱看將此由六百里各諭令知之○乙丑彭玉麟以疾乞假得旨長江水師關繫東南大局該侍郎在江上十餘年氣體日衰朝廷不忍遽拂其意第無重臣督率易於廢弛仍著於假滿後遵赴江皖擇地駐紮以資控制○左宗棠奏董志原回逆號稱十八營其中回酋如陳林崔巍禹得彥馬正和白彥虎于彥祿等皆擁眾萬餘素稱剽悍近因分股出掠均被官軍擊敗飢蹙日甚屢次乞撫復無成議遂糾集十八

營領巢東犯以陳琳馮君幅居前崔巍干彥祿馬正和藍明泰等
繼之其餘逆首隨後策應共合悍黨三四萬各裹十餘日乾糧於
初六日分道竄出屯踞正甯南北兩原及永樂堡白吉原宮河原
一帶勢將徑犯邠州三水併力以擾秦川初七日陝安道黃鼎在
邠州聞報卽飛飭總兵徐占彪率駐涇北世店之五營伏牛家堡
以扼其衝而調集所部彝字全軍由邠州繼發一面函約知府劉
倬雲自三水之職田鎮固原提督雷正綰自長武之政平鎮兩路
會剿是日午刻賊前隊數百騎馳上世店至牛家堡伏發立斃數
賊陣斬先鋒虎麻子生擒四人餘眾驚走官軍追至原邊賊大股
萬餘自白吉原擁出徐占彪以兵力過單扼溝而守是夜黃鼎親
率全部渡涇與世店五營合駐沿途遙見白吉宮河一帶號火燭
天綿亘數十里知賊勢眾盛傳令各營飽餐嚴陣以待初八日平

明大風東來回騎十餘由洪巖河上世店乘風馳驟黃鼎飭各營
堅壁勿動將俟其大股麇集突出擊之待至午間賊無踵至者遂
令馬隊衝出賊卽反奔官軍追下洪巖河賊分向白吉原奔竄沿
途拋棄騾馬以誘我師黃鼎急令各營整隊勿顧悉力跟追甫上
白吉原卽見陳林馮君幅率騎賊千餘擁至官軍奮力衝撲賊且
戰且走追十餘里至白吉鎮忽前途塵土蔽天回逆大隊馬正和
于彥祿等分十數路蠶擁而至每路約一二十人橫亘十餘里同
時張村底廟之閒伏賊並出陳林馮君幅亦回馬猛撲而前黃鼎
念已深入急令總兵章占雄副將趙興隆遊擊林定遠等率左右
各營以敵陳馮兩逆而令總兵徐占彪副將李玉春參將劉心灼
遊擊何玉超等率正副前後各營以當于彥祿馬正和大隊自率
縣丞青勝藍主簿謝初旭督中軍繼進以防伏賊包鈔布置甫定

賊已四合官軍圍結方陣周圍槍礮環擊而前賊死傷枕藉紛紛
敗退馬隊乘勢衝殺步隊繼進偪至原邊賊見事急合隊回撲崔
巍于彥祿等各率悍賊回馬來衝勢甚兇悍黃鼎見馬隊少卻急
督步隊猛進號鼓齊鳴參將胡應芳趙嗣昌督矛手直衝入賊陣
截賊隊爲兩段馬隊繼出槍礮矛刺斃賊百餘名賊大敗官軍分
道跟追偪一股至高里坊前阻深溝賊無去路逆首于彥祿率眾
死拒連放數槍副將劉治均躍馬挺矛直前刺落馬下官軍羣矛
攢刺割取首級其姪于驢兒馳救復被遊擊朱蘭亭衝出擒之餘
逆數百四散奔逃官軍圍而殲旃無得脫者其時崔巍馬正和等
望見勒馬馳救官軍乘勝衝擊縱橫盪決賊不能支大敗奔潰同
時韋占雄等亦將陳林馮君幅擊敗合隊跟追賊分路狂奔陳林
等走政平大股悉向宮河原竄去初九日大雪滿川追至宮河衣

械盡涇賊之前隊已竄早社官軍沿途技勦自辰至午復截殺尾
隊數百名餘皆竄回老巢先是固原提督雷正綰得黃鼎函約初
八日卽由長武率隊出政平未刻卽見陳林馮君幅等千餘騎奔
回望見官軍駭而北竄雷正綰麾軍截擊賊奪路向官河狂奔官
軍乘勝窮追殲賊甚眾初九日正拔隊赴官河助勦忽中途接據
探報回酋禹得彥率數千騎南渡涇河由窰店入黑河川竄至靈
臺之獨店柳家鋪一帶遂急收隊折回初十日抵長武之十五里
鋪探賊尙在獨店攻掠窰堡雷正綰策賊必不虞官軍之速至也
卽令各軍飽餐五鼓乘雪夜掩擊十一日黎明馳抵獨店鎮賊尙
未覺總兵陳義閔定邦等分數路大呼馳入賊多不及鞍馬倉卒
奔逃官軍奮力衝殺斃賊三四百名沿途追勦擒斬復多賊向西
屯什字鎮一路狂奔十三日甘肅按察使張岳齡自汧陽上店邀

擊於新集鎮復有斬獲餘賊悉向鄭家岸崇信一路折竄回巢

臣

等竊維回逆以糧盡力竭之餘出萬死一生之計大舉深入兇狡

實異尋常仰賴 皇上德威將士用命日夜苦戰大挫兇鋒見據

陝安道黃鼎解到逆酋于彥祿首級及生擒回目于驢兒等六十

餘名到

臣

宗棠乾州營次

臣

逐一提訊多係七八年稔惡積匪兇

狠異常當經擇其尤悍者十九名立予駢誅並於彥祿首級傳示

西同鳳被害地方百姓夾道懽呼觀者如堵洵足以伸 天討而

快人心得旨出力員弁著准其擇尤彙案請獎○丁卯飭安徽撥

解郭寶昌軍餉○撥戶部銀二十萬兩濟新疆各城餉糈○戊辰

諭軍機大臣等金順奏綏德營勇猝變盤踞州城見飭所部嚴加

備戒並請飭山西巡撫調軍扼紮軍渡一帶請將玩誤軍糧之知

州摘頂各摺片據稱駐紮綏屬新店之老湘四營兵變攻入州城

城守陳牧不知去向該逆勇並搶去成信軍餉銀數萬其義合兩營亦同時生變刻下州城逆勢愈熾有合股竄撲榆林之謀等語覽奏深爲詫異老湘一軍向稱得力此次駐紮綏德劉松山交與何人管帶何以任其搆變攻陷州城且西路回逆土匪並未淨盡該逆勇若與句合則下攻清澗上攻米脂而榆林相距非遙亦爲可慮金順見已商令劉厚基調撥一營前赴米脂並通知宋慶先由神木酌撥數營取道葭州赴米扼堵所辦甚是著卽督飭所部嚴爲扼防一面探明情形會同劉厚基等相機堵擊其成信軍新招後營馬隊已否隨同肆擾並著就近查明知照左宗棠等辦理左宗棠身統師干責無旁貸卽著會商庫克吉泰劉典嚴飭劉松山迅爲截定以遏亂萌並查明該營勇丁因何變亂據實奏明懲辦歸化距榆綏不遠自應及早防範著定安卽飭馬步兵勇擇要

嚴防毋任乘閒竄越綏德與永甯僅隔一河鄭敦謹尤當迅調勁旅於軍渡一帶先期扼紮以備意外之虞並於永甯迤南各渡口一體撥兵嚴防毋任擾及晉疆至湘軍畱駐黃河東西兩岸及山西永甯州屬之柳林鎮尙有三營難保不聞信思亂著左宗棠庫克吉泰鄭敦謹劉典察度情形妥爲鈴束金順摺內所稱之成守陳牧自係成定康陳瑞芝二員該員等見在下落並著左宗棠劉典查明具奏署葭州知州胡有志經金順派運軍糧並不上緊籌運任意枝梧實屬不知緩急胡有志著先行摘去頂帶仍責令將派運軍糧壩數解營如再有違延卽由金順咨照劉典據實嚴參以儆玩泄此項變亂勇丁恐其飽掠而歸仍取道河南著李鶴年迅派得力員弁帶隊前往堵禦免致紛竄將此由六百里各諭令知之○壬申諭軍機大臣等定安等奏請將神機營天津馬步各

隊暫停撤回並左宗棠奏請飭綏遠城將軍等嚴杜逆回接濟各
摺片歸綏地方遼闊防務緊要所有前次調往之神機營吉林黑
龍江天津馬步各隊既據該將軍等察看情形驟難撤回著准其
暫行停撤仍令各隊扼紮嚴防不准稍涉疏懈俟該處軍務略鬆
再行奏明辦理此次左宗棠奏奪獲逆首于彥祿所騎之戰馬據
逆姪于驢兒供係馬化澁餽送又據探報董志原賊巢糧食將絕
馬化澁於二月間用駝運糧接濟噉其入犯馬化澁陽雖就撫陰
實助逆是京師前此拏獲置買軍械之犯據刑部所奏恐有濟賊
情事已屬確實著該部卽提丁良潰馬天平二犯嚴刑審訊取有
確供卽行照律懲辦以昭炯戒逆回糧械等項既自金積堡販運
而來必由歸化城包頭一帶轉運前此包頭曾盤獲逆匪買馬是
其明證著定安桂成嚴飭各廳於所管地方認真盤查遇有甘肅

採買糧食戰馬槍礮等項非持有穆圖善委員印文一概禁止轉運以斷逆匪接濟之路毋稍疏忽將此由六百里各諭令知之○是月蠲免直隸安州等四州縣被水額賦

三月癸酉朔諭內閣曾璧光奏拏獲不法武員遵旨正法請將出力各員獎勵一摺已革總兵林自清前在雲南戕官屠民嗣後擁眾萬餘滋擾四川並多攜死黨回籍焚殺搶擄擾害閭閻甚至妄給頂翎私設釐局霸占田地無所不爲其帶勇由四川繞赴貴州興義縣時該署知縣陳世鎮因其蓄意叵測不令入城竟至挾嫌將陳世鎮及其子陳光洋並家丁二名盡行殺斃並搶去行李衣物實屬情同叛逆罪不容誅經曾璧光密派提督陳希祥等設法擒拏立在營前正法並將其隨帶練勇全行剿殺洵足以申國法而快人心該撫等於此事不動聲色籌畫精詳卒使積年巨慝首

從悉就殲除實屬辦理迅速所有出力之提督陳希祥著賞給達
春巴圖魯名號並賞穿黃馬褂布政使黎培敬著賞戴花翎道員
林肇元著交部從優議敘吳德溥著賞加布政使銜畢大錫著賞
給格洪額巴圖魯名號宣維禮著賞給博奇巴圖魯名號○諭軍
機大臣等豐紳謙禧奏陝匪突竄河西經官軍迎剿仍遁回河東
請飭金順督隊赴援一摺陝匪於上年十二月間竄撲橫城經官
軍擊退後復敢偷渡河西撲犯通昌等村莊並由磴口南竄搶掠
李岡等堡見經豐紳督兵擊敗該逆仍竄回河東卽著豐紳謙禧
就見有兵力隨時偵探認真堵剿毋令該逆得以肆擾第甯夏防
兵單薄設有大股回逆竄近力難堵禦前諭金順督隊回駐花定
等處刻下綏德勇變各軍俱集金順如能西行卽著左宗棠等酌
量情形飭令金順前赴花定等處駐紮以爲甯夏屏蔽用壯聲威

將此由六百里諭知左宗棠庫克吉泰劉典金順豐紳並傳諭謙禧知之○諭岑毓英奏官軍肅清武定州逆匪並攻克羅次縣城及邵甸等處賊巢一摺雲南自馬龍州城解圍後該逆分黨竄擾邑市等處經官軍節節進剿當將武定州境一律肅清復進攻羅次斃匪甚多該縣城亦經克復其邵甸古城柯渡可郎等處賊巢俱經官軍以次掃蕩岑毓英此次改調李廷標一軍由邑市橫出嵩尋之間上下截擊並飭何秀林等分道進取調度甚合機宜著該督撫飭各路將弁乘勝進剿以殄逆氛劉嶽昭仍當懷遵疊次諭旨親赴前敵督軍攻剿不得株守一隅將此由六百里各諭令知之○黔匪陷安南普安旋復之○予貴州被戕知縣陳世鎮祭葬世職○甲戌諭內閣劉崐奏援黔各軍連破苗巢並克復鎮遠府衛兩城一摺席寶田等軍自疏通清江後進規鎮遠一路上年

十一月間經榮維善等疊破抱金苗榜報谷黃牯里鬼科各寨斃賊數千人十二月間清江逆苗渡江占踞者磨附近之張溝經蘇元春等襲剿拔其柵壘殲斃逆酋輩往金失並賊黨數百人本年正月間苗逆九大白復糾悍賊三四千人屯踞上下棗經榮維善唐本有等率軍圍偏陣斬逆酋往垢堞等數十名餘賊悉數就殲蘇元章等並將秀地等寨次第攻克黃潤昌等會師焦溪派兵將竄擾思州晃州後路之賊肅清二十七日督隊直薄鎮遠府城各軍奮勇爭先斬關而入該逆奪路狂奔立將鎮遠府衛兩城克復分兵追擊連拔牙溪等處數十里先後擒斬賊眾二三千人其古州一路亦經戈鑑等軍疊克賊寨剿辦甚爲得手仍著督飭各軍進取施洞口等處節節掃蕩迅殄逆氛○諭軍機大臣等麟興等奏分安厄魯特人眾諸多窒礙暨請撥款籌買哈密牲畜等件各

一摺前據福濟等奏厄魯特人數眾多科屬之杜爾伯特未能安插擬於烏城庫倫之喀爾喀四愛曼內分置當經諭令麟興等遵照辦理茲據麟興等奏稱該城所屬之喀爾喀扎薩克圖汗賽因諾顏西兩部落並無隙地可容厄魯特人眾窒礙甚多已咨明福濟等另行酌議等語厄魯特人眾是否可以分布必須斟酌情形會商良策固不可冒昧舉行致貽後患亦不可因一處畏難不辦遂致彼此推諉著麟興榮全錦丕勒多爾濟奎昌明瑞福濟錫綸張廷岳阿爾塔什達悉心商酌各將該處能否安插有無窒礙之處通盤籌畫會同妥議具奏至烏城應撥哈密駝隻各件既未能措辦足數自應籌款買補以應急需前經戶部借撥銀二十萬兩解赴烏城交麟興等勻撥巴里坤哈密應用著於此項餉銀內提出銀二萬兩由文麟派員前赴烏城接領自行購買足數並著麟

興等派員幫同照料此項銀兩卽著文麟覈實報銷以清款目本日明降諭旨將布彥鄂勒哲依圖賞用黃纒並賞給銀二萬兩卽作爲特旨加恩著麟興傳知布彥鄂勒哲依圖俾該汗益深感激其銀兩亦於戶部借撥之二十萬內如數提用將此由五百里各諭令知之○以湖南官軍克復貴州鎮遠府衛兩城布政使席寶田等下部優敘餘加銜升敘有差予陣亡總兵官江忠珀祭葬世職加等諡武愍建祠范榮超等十六員祭葬世職加等○賞土爾扈特盟長布彥烏勒哲依圖黃纒並所部貝勒公等銀二萬兩○

丙子 上詣

大高殿祈雨○諭內閣戶部主事龍錫光呈遞條

陳一摺所稱躬行節儉刪除煩例墾荒田汰冗兵以及安置降眾簡練京營選牧令掩積骸各節著各該衙門妥議具奏○予直隸等處陣亡副將周盛武等祭葬世職建祠○戊寅左宗棠奏回逆

東犯官軍迎勦大捷賊回巢後恟懼益甚始下僞令挈眷先徙金
積堡以悍賊殿後拒官軍繼復議暫勿移巢而賊中自縊者紛紛
不能禁遏各路訶報相同臣飭諸路統領急將糧料運足伺賊竄
動則追之慮各路銳進而賊或分支擾我後路也復令各畱四成
隊於後以期慎密又慮各軍分布數百里未能剋期畢赴則飭各
軍相機而進但覘賊動卽各銳進追之毋懷觀望二十二日探報
賊之輜重婦女老幼已竄動而悍賊則仍扼太昌鎮二十三日雷
正綰黃鼎馬德順補用道李耀南率馬步各軍由長武縣分三路
直擣太昌鎮卽於是日師進三不通地方二十四日進西峯鎮蕭
金鎮鎮原縣孟壩寺三汧河等處二十五日進驛馬關北十五里
白馬鋪追殺悍回實一萬數千名拔出被擄漢民男婦數千復由
白馬鋪越蔡店追殺至慶陽府沿途賊屍枕藉人馬之墜崖倒斃

糧盡餓斃者不可數計見在乘勝窮追尙未收隊所有各軍獲勝
詳細形容俟續報察看賊蹤由西而北徑趨金積堡諸軍躡追
甚急其老弱婦女輜重縱盡達金積堡繼後之悍賊必可殲除淨
盡機勢實爲順利

臣

宗棠既飭各軍分路前進正擬率親軍進邠

州忽於二十二夜得

臣

劉典急報甘肅提督高連陞所部弁勇忽

變二十夜三更更有賊數百圍高連陞楊店營帳將高連陞戕害營
官總兵銜副將賀茂林提督銜總兵黃毓馥聞變救援均同時遇
害叛卒既戕統將卽徧脅各營各營之預謀者起而應之倉卒之
頃營哨各官均不知所爲二十一日駐金鎖關之副後營營官楊
銘濬聞變帶所部馳援行過同官要同官守將遊擊桂錫楨與俱
甫行十餘里遇楊店逃出弁勇告知統將被戕營官幕友均已遇
害叛卒已脅各營爲亂將趨同官脅馬隊營劫糧局趨金鎖關脅

副後營楊銘濬帶十餘騎折回同官而所部步隊在後桂錫楨帶所部馬隊急回同官布置城守少頃叛卒大至繞西北兩面大聲而呼城上無應者楊銘濬在城上瞥見所部副後營旗幟亦植立不動異之遽下城招呼就列甫入隊中隊中亦呼殺營官楊銘濬甫上馬矛已及其左足桂錫楨在城上瞭見知副後營亦變遽下城率隊衝入副後營後哨哨長參將龍恩思及未與逆謀各弁勇擁楊銘濬出警槍挺矛拒追者桂錫楨楊銘濬遂同入城登陴固守叛卒環逼城下桂錫楨禦之槍礮對施斃賊數十名其攀援上城者皆經刀矛所刺紛紛墜下楊銘濬龍恩思亦各手刃兩賊自是日巳午之交至二十二日卯刻叛卒徹夜猛撲桂錫楨憑城刺殺數百名奪獲木梯三百二十餘架天明賊退桂錫楨開城追剿斃賊八十餘名生擒叛卒十一名正酣戰聞伏賊從東西兩溝笑

出桂錫楨面被矛傷右手受石傷縱橫血戰賊仍敗走是日辰刻
記名提督周紹濂聞變率所部中前右三營行隊迅赴古泉適叛
卒譙擁而至周紹濂督副將劉甫田同知張權英副將周玉林等
分路堵剿立斃悍賊十餘名步賊數十名賊始敗遁官軍進據古
泉空壘叛賊仍敢圍壘猛撲均經劉甫田等悉力擊退乘勝跟追
計共斃賊三百數十名繳出軍器伏地自投者五百餘名而官軍
已陣亡十四名帶傷者四十餘名蓋亦惡戰矣二十三日桂錫楨
復派馬隊兩哨進攻金鎖關米子窰擒斬多名叛卒望風而靡臣
劉典聞變之初立派記名提督丁賢發率所部進耀州扼其南竄
是日卯刻抵耀適叛卒已經桂錫楨周紹濂等擊敗其兇悍之尤
甘心爲逆者擒斬殆盡其倉卒被裹繳械來降者四百餘名丁賢
發收之其分駐馬欄鎮之果軍後營營官副將李瑞林前營總哨

官王光發於軍變時恐眾心不固，緘請知府劉倬雲赴馬欄以資鎮壓。二十二日，劉倬雲率所部三營及親兵中哨馳赴馬欄，傳集弁勇，諭以大義，毋得受人愚弄。自干刑誅。二十三日，率之同歸職田。二十日，鎮李瑞林派弁勇赴楊店覓高連陞，遇骸得之，昇歸職田。二十四日，總兵張福齊截擊叛逆餘黨於馬欄，鎮賊已散盡，收輯被脅者一百五十餘名。是夜三更，劉倬雲聞叛卒有趨赴山河鎮入董志原者，急率所部截之。二十五日，已刻抵山河，適回逆白彥虎、鄒阿渾餘黨馬步約數百來窺山河。劉倬雲令軍士卸號衣扮叛卒前往誘之。比以大隊轟擊斃逆四十餘名，生擒回目許阿宏等十四名。訊據供稱叛逆約其來迎，不料爲官軍所敗也。通計高連陞所部馬步九營除桂錫楨馬步全營殺賊立功外，李瑞林所帶後營正前營總哨王光發所帶三哨及各營弁勇從叛軍中衝出。

來投者共又收集五營其已經官軍擒斬者千餘名事已大定訊據生擒叛勇及賊中逃出弁勇共稱二月初旬高連陞因各營收畱外來游勇甚多中有哥老會匪藏匿飭各營哨嚴察懲辦勒令自悔而前營親兵丁玉龍畏罪倡亂喊各營之曾經入會者勾約同逆於二月二十八日入犯因而舉事適高連陞捕丁玉龍甚急丁玉龍竄入左營與左營管軍裝差弁郎宏勝卽郎麻子哨長朱德遠右營哨長蔣宏高前哨什長石文科等迫不及待密謀於二十日夜三更藉索餉爲名徑赴高連陞楊店營次致此異變其時各營未預逆謀之弁勇均以變起倉卒被其脅制幸桂錫楨周紹濂扼之同官古泉疊加痛勦叛黨駢首就戮而未變各弁勇始得自拔來歸計該軍謀變起事未及五日已就撲滅而剿回之師自太昌劫家堡起追過三不通蕭金鎮西峯等處直抵慶陽府城凡

董志原賊巢無不窮追徧到一律肅清叛逆無可句之回回逆亦無可句之叛而異變旋銷大局敕靜此固非

臣

等意料所及也見

飭將未變各弁勇概行收輯歸併成營以便從容編審淨絕根株其同時遇害之各員弁勇丁應俟確查後再請恩卹逆黨陳恆貴黃起昌鄧得勝熊益貴熊兆祥匡世明黃秀成王永春張連芳等均經訊明斬梟其首逆是否已經擒斬尚未據各軍稟報見通飭各州縣營汛及渭河水師潼關荆紫關各防軍嚴密巡察務獲盡法懲處以申軍令而雪高連陞及遇害各員之恨伏念甘肅提督穆特木巴圖魯高連陞從軍楚粵屢著戰功洊擢廣東右江鎮總兵

臣

崇棠於咸豐十一年入浙時調其隨征克復湯谿縣金華府

城及浙江省城湖州府城浙江全省肅清復追剿首逆李侍賢汪海洋由江入粵克復廣東鎮平縣城嘉應州城擢授廣東陸路提

督臣宗棠念廣東亂民過多制兵又不足特於班師回閩時奏請飭高連陞赴任以資整理高連陞在任殲除土客各匪聲績卓著適臣調督陝甘高連陞函牘頻來堅求同剿回逆臣宗棠奏調赴陝高連陞感激圖報勦捻回無戰不克身爲大將臨陣輒躍馬爭先收隊論功輒推獎諸軍若未嘗親預其事者爲人廉靜樸訥待士卒有恩自奉最約任實缺提鎮多年廉俸均充公用臣宗棠臣典近因其家無擔石兩親尙在甘旨缺如擬各分廉餘爲之薄謀菽水聊資贍養而高連陞以欠餉已久義不可先顧己私堅辭不受其節概如此以該提督忠勇廉讓宅心寬厚如此不死於賊而死於二三逆豎之手此則臣等所不解者也仰懇 皇上天恩飭部照提督陣亡例議給卹典俯允賜諡並宣付史館立傳以彰戰績該提督前轉戰閩浙廣西廣東陝西各省勞績卓著其立功

之地可否准建專祠以示恩褒而昭激勵又奏臣等連日辦理果
軍叛勇一案甫將就緒二十六日忽接劉松山所部駐山西永甯
州軍渡之管帶中軍三旗提督何作霖飛報本月十三日已刻有
勇丁自綏德州來據稱駐紮綏德州之前軍後旗勇丁因邀結哥
老會經該營官查出縛犯將按軍令忽該營勇丁遽起奪犯左軍
四旗弁丁從而附和右旗後旗及馬隊四營繼起應之當劫劉松
山所設綏德州城糧局何作霖聞變慮駐西岸宋家莊之五旗被
其勾煽乃調過東岸以便鈴束十六日已刻叛卒東來軍渡對岸
揚旗吶喊意似勾引東岸之三旗五旗何作霖令三旗五旗勿動
仍開礮轟之叛卒遽退探報劉松山所駐綏德州城外者同時俱
變分統之提督易德麟蕭章開總兵章合才及馬步各營官有雖
營者有被叛卒脅制入城者惟營務處提督黃萬友堅不入城叛

卒亦不敢偏見仍駐城外然隨身僅親軍二十餘人無如何也旋據前署綏德州知州成定康十六日自延川之虎兒塢發稟據稱十三日辰刻湘軍突變襲踞州城十四日成定康帶隊衝出是日叛卒追至石家溝將成定康圍住是夜五更成定康突圍而出殺叛卒甚多而官軍亦陣亡五十餘人十五日行五十里至棗坪將赴清澗叛卒復截阻去路成定康繞出店子溝以向虎兒塢擬於十七日赴延水關駐紮續據署綏德州知州陳瑞芝自州城外二十餘里周家河稟報情形大略相同尙未接到劉松山緘牘蓋相距千餘里北山各州縣尙無驛站文報必繞由山西馳遞陝省中多梗滯也惟劉松山全軍糧路專在軍渡其地屬山西永甯州當綏德州正東茲州城爲叛卒所踞而該軍採儲之糧存西岸宋家莊者據何作霖稟又已爲張曜上年逃回嵩武三營潰卒乘機劫

奪劉松山勢難直趨綏德州非繞由延川之延水關就糧不能前

進也見據延安府縣稟報劉松山已抵延安矣臣前因高連陞果

軍潰叛檄調郭寶昌分撥數營由洛川中部一帶進剿茲果軍叛

卒既平而綏德州復有叛卒陷踞州城之事局勢既更不得不隨

宜布置已飛飭郭寶昌迅由宜川進延長延川會同劉松山成定

康進剿宋慶一軍已到神木亦檄其由神木南趨相機進剿一面

飭何作霖嚴扼軍渡一面咨山西撫臣飭山西已革臬司陳湜嚴

防偷渡又全福馬隊一起已據報正月十九及二十九日啟程計

此時已行抵直隸應懇 天恩飭下直隸督臣山西撫臣札知全

福由汾州永甯州過河隨同劉松山進剿其後永甯州所需餉糧

馬乾臣等已飭汾州永甯採運局員豫備矣全福郭寶昌宋慶曾

與劉松山共事最稱契洽當可相與有成也事變紛乘倍形跋扈

謹當悉心商榷慎以圖之上諭軍機大臣等董志原回匪疊經

官軍懲創潛謀竄遁經雷正綰黃鼎等督軍追剿自太昌劫家堡

起直抵慶陽府城斬馘盈萬沿途賊巢一律肅清見在賊蹤徑趨

金積堡正可乘其喘息未定痛加剿洗著左宗棠劉典飭令各軍

節節進剿毋稍鬆勁追軍既經深入仍當策應後路以助聲援不

可稍涉大意所有各軍獲勝情形並著詳細奏聞果軍營勇變亂

提督高連陞被戕本日已明降諭旨照請予卹矣此次變起倉卒

經周紹濂等扼之同官古泉叛黨殲除殆盡辦理尙爲迅速首逆

丁玉隴是否在逃必須嚴拏務獲盡法懲治毋任漏網綏德州叛

勇情形前已據金順鄭敦謹先後奏報諭令左宗棠等速籌戡定

見在郭寶昌宋慶等軍均已前進兵力甚厚著左宗棠劉典飭令

劉松山會合各軍迅速圍剿毋任旁竄其軍渡一帶著鄭敦謹飭

令陳湜嚴密守禦以防偷渡陝省各營旬日之間勇丁兩變殊屬不成事體左宗棠身統師干責無旁貸應如何整頓營規撫馭將士豫籌弭變之方務當悉心籌畫以固軍心而杜後患全福馬隊計已行抵直隸境內著曾國藩鄭敦謹催令由山西汾州永甯州過河隨同劉松山進剿毋稍遲延將此由六百里各諭令知之○子陝西楊店被戕提督高連陞祭葬世職加等諡勇烈於廣西浙江福建廣東陝西立功地方建祠○庚辰以麟書爲盛京禮部侍郎由內閣學士遷○壬午諭軍機大臣等李鶴年奏籌撥潼關荆關兩路防軍一摺綏德變勇見經官軍進逼難保不乘隙逸出該逆既有覓路回家之意勢必取道河南李鶴年見已令宋慶由神木拔隊會合張曜等軍進剿並令酌撥數營沿河迤南直趨潼關與馬德昭防軍合力守禦所籌尙妥著卽飭令該提督等會合各軍速爲

戡定並偵探賊蹤相機防勦毋任闖入豫境荆子關一路爲豫楚交錯之所尤應先事嚴防王萬釗所帶標兵爲數無多恐難得力著李鴻章酌派兵勇迅赴該處會同王萬釗之兵實力防範以備不虞本日據吳坤修奏皖省撥解郭寶昌軍餉由湖北轉運該營久未接到恐由西安轉解以致遲滯見在郭寶昌駐紮宜州派員在潼關接餉著李鴻章飭令轉運局嗣後凡遇皖省解到該軍餉銀卽行徑解潼關交郭寶昌委員兌收以期無誤要需將此由六百里各諭令知之○癸未改福建臺灣鎮標右營臺灣協中營澎湖協左右二營都司暨臺灣鎮標右營守備爲千總噶瑪蘭守備爲把總裁臺灣協中右二營澎湖協左右二營守備各一缺臺灣鎮中左等營千總十四缺把總十七缺外委四十六缺馬兵五十名戰兵三千七百四十七名守兵三千一百五十六名改鎮標右

營爲道標專隸臺灣道轄○甲申諭軍機大臣等前因降眾李維忠等由天津潛逃出關當經諭令盛京等將軍府尹一體嚴拏務獲旋據奕榕奏稱拏獲李振隆一名正法而李維忠原名李維藩綽號烏痣李及徐萬良丁萬幅董勤李恆等五名遲至十月之久僅據富明阿奏將李恆拏獲其餘均未就擒李維忠等在關外時種種不法投誠後狼子野心仍復怙惡不悛若不亟行拏辦必致潛匿滋患著都興阿富明阿德英志和恩錫魁齡飭屬嚴密躡緝務將李維忠卽烏痣李等按名弋獲卽於該地方正法以杜後患並著知照各蒙古旗一體兜拏不得任意遷延致干重咎將此由五百甲各諭令知之○諭史念祖由軍營出身人尙明白惟未經歷地方事務是否能勝臬司之任著曾國藩畱心察看據實具奏以重地方將此諭令知之○調張樹聲爲山西按察使史念祖爲

直隸按察使○乙酉、上詣 大高殿祈雨○諭內閣御史宋邦
億疏請整頓吏治一摺州縣不得人則百姓休戚漠不相關如該
御史所陳興教化杜浮收清案贖省徭役禁官價除盜賊修城池
禁賭博治衙蠹減僕從各條均爲州縣官應行之事著各省督撫
嚴飭實心講求有廉勤素著者卽列名保奏不職之員從嚴參處
至社倉社學普濟堂育嬰堂皆有裨於吾民著飭所屬查照舊章
一律興復○諭見經克復地方小民亟宜復業乃田疇或占於豪
强舊賦或虧於官長困苦情形殊堪矜憫著各督撫慎選牧令加
意拊循流亡有歸業者爲之清還田產緩其通租假以籽種俾有
歸農之樂以卹民艱而固邦本○諭昨因英翰百日服滿降旨令
仍回安徽巡撫署任茲據英翰奏稱憑陳下情以伊父葬事尙未
完竣籲懇畱京當差等語英翰著賞假兩箇月經理葬事假滿後

仍卽迅赴安徽巡撫署任以重職守○丁亥諭軍機大臣等傳諭安徽巡撫吳坤修吳坤修奏皖省捐釐利弊餉項支絀辦理竭蹶情形裁軍濟餉請飭詢英翰各摺片據稱每月入款約計全皖貨釐不及三萬兩長淮四成鹽釐一萬餘兩兩淮協餉五千兩鹽課一萬二千兩撥解軍餉所短甚鉅卽動用丁漕亦難挹注等語吳坤修署理巡撫皖省籌餉事宜是其專責乃僅以所收各款入不敷出爲詞而於餉需如何籌畫各軍如何撥濟未據聲敘若遇事並不實心籌辦僅將爲難情形一奏塞責朝廷又安用此封疆大吏爲耶又據稱擬將防兵裁撤數營勻出月餉增補郭寶昌軍餉惟畱防之軍英翰又面屬不宜輕撤請飭詢英翰等語居心尤爲巧滑皖中情形英翰固已洞悉吳坤修豈應諉爲不知且吳坤修見在署任並不因時制宜妥籌奏聞轉請飭令久經交卸之英翰

詳審覆奏尤出情理之外著吳坤修將皖省餉項通盤籌畫並留防之軍應否裁撤酌定辦法迅速具奏毋再意存取巧致干咎戾尋奏西征協餉並郭寶昌月餉儘力籌解至畱防之勇此次續裁後尙存一萬五千餘名見在伏莽仍多未便全撤再容相機辦理以期妥善報聞○諭金順奏收復綏德州城大略情形派隊剿辦邊外竄匪請飭撥兵扼紫靖邊各摺片綏德叛勇經南岸清澗劉厚基一軍由米脂前進收復州城跟蹤追剿擒獲逃匪多名其大股逆匪已經劉松山剿辦被脅各勇分別收撫所有情形仍著左宗棠據實具奏其收撫各勇著責成劉松山妥爲鈴束毋致再生事端榆郡迤西邊外海流圖河暨波羅堡西南一帶約有竄匪六七千人並有達拉旗竄來回逆數千金順已派常福等會同劉厚基所派之兵出邊截剿著卽確探賊蹤如有大股東竄之信卽行

親督各營前往截擊毋任滋蔓此股賊匪係從何處竄至並著查明具奏歸綏防務未可稍鬆前調神機營等兵業經准其暫停遣撤仍著定安嚴密布置豫籌防範其宋慶張曜等軍應如何調度之處著左宗棠妥爲籌畫前據穆圖善豐紳謙禧先後奏請飭令金順前赴花定防剿見在東路既有賊蹤該副都統自應速籌剿辦一俟軍情稍鬆卽行回紮花定以資控扼靖邊一帶亟應派兵堵剿並著左宗棠酌度辦理甯夏一帶防務仍著豐紳謙禧就見有兵力認真籌辦並著穆圖善妥籌兼顧將此由六百里諭知左宗棠穆圖善定安金順豐紳並傳諭謙禧知之○諭崇實吳棠奏援黔各軍獲勝一摺川省陳希祥一軍援剿貴州上游克復定南城後招撫七十餘堡收降賊黨三千餘人乘勝蕩平卽岱所屬各賊巢斬賊甚眾下游唐炯懸軍深入疊破苦竹等苗寨提督劉鶴

齡復分軍跟蹤掩擊連下重拜等數十寨收復重安要隘各軍同
出清平縣城不難卽下惟下游環境皆苗彼眾我寡前本令陳希
祥移師下游會同唐炯進剿見在陳希祥辦理上游軍務正在得
手黔省兵單若將該軍移赴下游轉致鬆勁著曾璧光飭令陳希
祥卽由安順埽蕩直前務將首惡嚴黃各逆悉數殲除肅清上游
各境以專責成至下游諸苗必須痛加剿洗陳希祥旣不能移師
合剿唐大有所部又調赴滇中唐炯兵力過單不敷分布著崇實
吳棠檄飭該道增募五營以資厚集仍飭令迅速圖功毋得虛糜
餉項劉崐亦當嚴飭楚軍會同川軍早戡黔亂毋稍觀望其上游
下游兩路軍情並著曾璧光隨時妥籌兼顧將此由五百里各諭
令知之○予甘肅陣亡副都統烏勒西布祭葬世職建祠並入祀
昭忠祠○撥吉林黑龍江官兵各二百五十名察哈爾官馬五百

匹赴金順軍營○已丑諭麟興酌撥巴里坤滿營經費○庚寅諭軍機大臣等定安等奏察哈爾馬隊擊賊獲勝撥隊迎剿另股賊匪暨查詢磴口失守情形各摺片杭錦旗內盤踞回逆雖經剿滅兩股惟尙有一股逃竄逆首藍倍漳亦未就擒難保不糾黨復來再圖肆擾著定安飭令達爾濟等探蹤截擊務將此股敗匪盡數殲除毋畱餘孽杭錦旗界連磴口尤恐外來匪黨乘間竄入並著飭令達爾濟嚴密防範以顧西路磴口迤東後套纏金一帶既有股匪七八百名該處由後套陸路可以直達歸綏則包頭地方防務實爲喫緊張曜已派王連三等管帶四營移紮包頭迤西黃河對岸烏爾圖那遜亦赴後套纏金一帶進剿卽著定安檄令該員等認真防剿以遏賊氛並知照杜嘎爾嚴防後套聯絡聲勢毋得稍有疏虞磴口失守糧臺餉銀被劫該處係穆圖善儲糧之所關

繫甚重見在賊勢如何究竟失去糧餉若干著穆圖善金順查明具奏甯靈兵力過單勢難撥兵進剿磴口踞賊穆圖善自應迅派隊伍前往剿辦毋任賊勢鴟張至董志原雖經收復賊眾均退踞金積堡老巢左宗棠如何籌畫進兵及近日各路剿賊情形著卽詳細具奏包頭一帶防務緊要張曜見在古城能否親督所部相機援應之處著該大臣酌度辦理將此由六百里各諭令知之○廣廣東合浦縣學額三名○辛卯諭內閣前因山西按察使史念祖於召對時見其年歲甚輕恐於地方事務未能諳練當降旨與直隸按察使張樹聲對調並諭令曾國藩察看茲據曾國藩奏稱直隸刑案積壓極多見與臬司力籌清釐甫有端緒若張樹聲能畱畿輔計一年之內可將積案全清等語曾國藩到任後辦事認真於吏治民風實心整頓力挽敝習自應俯如所請收指臂之助

張樹聲著准其暫畱直隸按察使以資熟手臬司爲刑名總匯該督奏稱史念祖初入仕途縱有過人才智而欲究諳刑律熟悉地方非數月期年不能所籌亦係實情史念祖年力正強人亦明白若隨同曾國藩講求公事正可藉資歷練史念祖著仍赴直隸將刑名案件悉心學習暫緩接印任事俟張樹聲清理積案完竣後再由曾國藩奏明請旨○諭軍機大臣等金順奏會剿邊外竄匪獲勝並擊退花馬池回匪各摺片賊匪竄至邊外海流圖河馬家梁等處經常福等會合劉厚基所派之兵分路兜擊斃賊三千餘人餘匪向西遠遁惟邊外地勢遼闊匪蹤來去無定且據獲賊供稱另有馬賊數百名繞道向東北竄去究竟竄往何處著定安金順確探賊蹤派兵截剿毋任擾及東路昨據定安奏稱杭錦旗踞匪逃竄一股後套纏金一帶股匪七八百人是否卽係此股匪徒

著定安查明具奏該逆分竄邊外恐有窺伺包頭之意著定安飭令達爾濟烏爾圖那遜等認真防剿力遏賊氛張曜一軍見在古城於邊外地勢賊情自應熟悉著左宗棠飭令相機援應合力截剿毋誤戎機本月初間回匪突襲花馬池城經富勒琿等擊退難保不再圖撲犯金順已調洋槍隊及衝勇一營前往助守著卽飭令富勒琿等加意防範不可稍涉大意將此由五百里各諭令知之○以李慶翱署山西按察使

由河東道署

○壬辰兵部等部議覆調

任兩江總督曾國藩酌改江蘇水師營制事宜一江蘇水師應改爲內洋外海裏河三枝以資控馭一內洋外海營數應以蘇松鎮川沙吳淞二營改歸福山鎮管轄並提督所轄南匯營蘇松鎮中營左營狼山鎮掘港營爲外海六營蘇松鎮右營福山鎮左營狼山鎮右營並新設通州海門二營爲內洋五營一裏河水師應以

原設提標右營太湖左營右營並添設淞北淞南二營爲五營專歸提督管轄一狼山鎮新設通州海門二營應歸江南提督專管並由水師提督兼轄一外海每營撥廣艇二號內洋每營撥三板十二號太湖等營酌撥三板十三號至二十號不等應卽興修一續造輪船四號分撥提督及蘇松各鎮協專巡外海內洋一江南設立船廠按年輪修戰船輪船應由上海船塢整理一水師專以管船爲主每船設一官大者設兩官其無船之弁兵一律裁撤一裏河內洋兵糧照長江章程給發外外海較爲辛苦應遞加以示區別一前議設立淮揚水師應行緩辦一太湖七營改爲裏河五營應裁員弁遇有裏河缺出卽行酌補一所裁內河外海及通州海門兩營守備等員分歸兩提督先行序補一蘇松鎮中軍應仍其舊狼山福山裁去中營應以通州營遊擊爲狼山鎮中軍福山

營遊擊爲本鎮中軍各畱陸兵百名以備差遣一統計水師俸餉
歲需十五萬餘兩兵米雜費四萬餘兩覈算歷年司庫實發銀兩
足敷支放無庸另議款項以上十四條均應如所請辦理從之○
癸巳諭軍機大臣等鄭敦謹奏綏德叛勇安輯河防解嚴並賊匪
圖竄包頭張曜等撥兵前進劉典奏叛勇戡定擬回省會勘秋審
各摺片綏德叛勇經左宗棠派兵圍剿殲除殆盡晉省永甯沿河
一帶防務解嚴鄭敦謹擬將前調之晉右春左中軍三營歸防著
卽飭令各回原派防所以期分布周密陝甘回氛尙熾晉防究未
可鬆所有沿河防務該署撫卽令署臬司李慶鼎接辦以專責成
並擇要駐紮聯絡各軍聲勢毋稍疏虞劉典所奏湘軍果營變勇
勦撫均已就緒與鄭敦謹奏報情形大略相同陝邊各隘見均安
靜劉典著暫行回省將秋審事宜妥爲會勘惟果營逃出叛勇數

十人向逆同老巢遁去湘軍搆叛首逆在逃餘孽亦未淨盡仍著左宗棠等嚴飭劉松山各軍隨時按捕以絕根株陝省各營營規見在如何整頓嗣後有無變通辦法及湘軍果營起釁詳細情形左宗棠當懷遵疊次諭旨據實具奏董志原踞回既歸併金積堡老巢見在陝之邠長及中部宜君鄜州延安一帶是否肅清甘肅靈州本係逆回麇聚之區東與花馬池及定靖各邑相近出邊卽河套鄂爾多斯旗境沿套迤西而北又可直趨包薩刻下花馬池杭錦及後套鹽金均有賊匪竄及磴口又有匪踞蔓延一片甚屬可虞應如何布置之處著左宗棠相機妥籌該大臣見駐乾州是否扼要能否顧及北路均著酌度隨時奏聞包頭偏近歸綏賊圖竄擾張曜已派兩營赴包頭西岸駐守宋慶亦由神木前進定安務當飭令馬陞及在防文武會同張曜等相機夾擊並晝夜實力

嚴防毋任逆蹤近擾將此由五百里各諭令知之○甲午諭內閣
文麟奏已故郡王之福晉捐糧助勦懇恩獎勵等語已故郡王追
封親王伯錫爾之福晉邁里巴鈕自哈密軍興以來籌捐兵勇口
糧並借回地以備屯田藉資軍食此次投勦西山竄逆復自備資
斧遣台吉等隨同官兵征勦約束回部以衛地方洵屬深明大義
伯錫爾之福晉邁里巴鈕著加恩封爲親王福晉其應得敕封該
衙門卽行頒給○諭軍機大臣等文麟奏投勦賊匪情形請將出
力各員獎勵各摺片七道溝逆首胡爾板胡里句結吐魯番賊匪
圖犯哈密文麟督兵於沙窩子鴨子泉等處投勦疊勝擒獲胡爾
板胡里等正法餘匪見已遠遁辦理尙爲得力惟吐魯番逆首蘇
布爾蓋既有窺伺哈密之意自應嚴加防範著文麟督飭官兵扼
守要隘勤加偵探遇有賊蹤竄近卽行痛加截擊其本地夏回並

著妥爲安撫以靖內患見在哈密防務緊要景廉當懷遵前旨卽行赴任會商辦理毋再遷延前因肅州收復諭令成祿卽行出關此時計已部署起程著卽迅速前進相機剿辦不得藉詞逗畱文麟另片奏逆首索煥漳遣人面稱意欲投誠見已派員會同成祿委員前往招撫等語該逆狡詐性成是否真心歸順殊難憑信文麟等務當酌度情形妥慎辦理不可輕率從事卽該逆果能就撫其黨與眾多亦止可於吐魯番等處設法安插斷不可使其移近哈密致滋事端將此由四百里各諭令知之○乙未諭軍機大臣等蘇鳳文馮子材奏克復憑祥土州情形蘇鳳文奏添勇赴黔會剿各一摺逆匪吳亞終由越南分股回竄闖入憑祥土州蔓延龍州下凍等處經馮子材督軍進攻連破賊壘克復憑祥土州餘賊遠遁太鎮境內已無賊蹤惟該逆去來無定不特太鎮等屬時虞

滋擾卽越南境內亦屢受其害自應迅拔根株以清邊圉馮子材已派謝繼貴等四營越境進攻那涯等處逆巢恐兵力尙單著卽添撥勁旅由龍州憑祥繼進力圖掃蕩大兵所至務須約束嚴明不得絲毫擾累是爲至要貴州九阡苗巢久爲粵邊之患孔憲隆四營見紫荔波蘇鳳文已添派潘其泰三營馳往會剿著卽飭令各軍實力進剿迅掃逆氛其古州一帶賊匪並著確探情形次第剿辦將此由四百里各諭令知之○諭李鶴年飭宋慶仍駐陝甘剿賊○已亥諭內閣朕奉 慈禧皇太后 慈禧皇太后懿旨本日據倭仁奏大婚禮宜崇儉以光聖德一摺皇帝大婚禮儀前曾諭令各該衙門先期敬謹豫備又恐應辦事宜或致踵事增華稍涉糜費特派恭親王寶鋆會同各該衙門堂官詳稽典章以杜奢靡而示限制皇帝大婚禮儀攸關自不能不籌款辦理惟見在

民生未裕軍務未平物力艱難正宜倍加愛惜前據該王大臣等奏稱乾清門外一切工程浩大業經諭令概行停止宮內止令稍加修葺以示撙節倭仁所奏與朝廷愛民節用之心正相脗合著該王大臣及總管內務府大臣並承辦各衙門於一切應辦事宜凡有可以節省之處隨時會商奏明請旨酌量減裁並力杜中飽用副敦崇節儉至意○飭催各省迅解京餉○辛丑諭軍機大臣等穆圖善奏各軍勦匪獲勝見仍相機進取並查明高臺潰勇情形各摺片河州三甲集踞匪負隅日久經副都統善山保等分路進攻該逆膽敢迎拒其東西兩梁之賊勢尤兇悍提督王得勝等乘勝追擊直抵三甲集堡邊洮河邊賊亦經黃金山等擊敗此次各軍會同進剿尙爲得手卽著穆圖善檄飭善山保等各軍所部趁此天氣融和迅圖埽蕩並將大東鄉一路相機進取以竟全功

高臺勇丁潰變該署督所聞雖覈與成祿原咨情形相異惟副將黃應斗所招勇內究竟有無仁字軍脫逃游勇及駐高勇丁因何譁潰之處仍著該署督詳查懲辦毋稍含混前據文麟奏稱首逆索渙漳投誠各節當經諭令成祿卽行出關該提督計已啟程著卽剋期前進並將所部勇丁分別汰畱嚴行約束毋任沿途滋事索渙漳等是否真心歸順該提督卽會同文麟等派員妥辦不可輕率議撫致貽後患將此由五百里各諭令知之○調吉林黑龍江馬隊各一千名赴甘肅助剿○飭四川撥銀三萬兩解甘肅採買籽種○予甘肅陣亡州判劉習之等祭葬世職○壬寅以孟夏時享 太廟 上前期親詣行禮○諭內閣前因都察院奏編修朱福基等呈稱前任廣西巡撫鄒鳴鶴在江甯殉難與御史朱鎮所奏情形迥殊當諭令馬新貽丁日昌查明具奏茲據奏稱徧訪

當時在城紳耆僉稱鄒鳴鶴協同防守事有條理及城垂破誓以身殉旋因罵賊不屈被戕並無避匿民居之說朱鎮所奏係屬傳聞之誤仍請優卹予諡等語朝廷褒忠之典綱紀攸關鄒鳴鶴殉難情形既據訪查確實著仍照曾國藩原請照巡撫例從優議卹予諡以彰忠烈御史原許風聞言事惟事關人之名節亦豈得冒昧瀆陳茲朱鎮於鄒鳴鶴死事情形並未詳查經曾國藩察訪明確奏准賜卹予諡後輒以傳聞無據之詞遽請撤銷實屬不勝言官之任朱鎮著回原衙門行走以示薄懲○諭軍機大臣等本日據周達武奏川省邊防緊要未便以重兵久駐夷地補擬善後八條開單呈覽等語四川越巂等處夷地見經官軍戡定亟須地方文武各官妥籌善後認真經理方能夷漢相安該提督所陳慎選文武及善後八條著崇實吳棠悉心會商妥爲辦理原片單均著

鈔給閱看將此由四百里各諭令知之○是月豁免兩淮富安等
十四場舊欠竈課蠲緩廣西新甯等三十一州縣被擾額賦